

სრულიად საქართველოს კათოლიკოს-პატრიარქი ინდოეთის ახლადდანიშნულ ელჩს შეხვდა



ა.წ. 6 დეკემბერს სრულიად საქართველოს კათოლიკოს-პატრიარქმა ინდოეთის ახლადდანიშნული ელჩი, ბ-ნი კიშან დან დევალი მიიღო.

შეხვედრაზე საუბარი შეეხო ჩვენს ქვეყნებს შორის არსებულ მეგობრულ ურთიერთობას. მისმა უწმინდესობამ მადლიერება გამოხატა ინდოეთის ხელისუფლების მიმართ რომელთა თანხმობითაც დედოფალ ქეთევან წამებულის წმინდა ნაწილები სამშობლოში ჩამობრძანდა და მრევლს მიეცა მისი მოლოცვის შესაძლებლობა.

„დიდი მადლი შემოიტანა ქეთევან წამებულის წმინდა ნაწილების ჩამობრძანებამ. მოხარული ვიქნებით, თუ ერთი ნაწილი საერთოდ დაბრუნდება საქართველოში. ყველაფერს გავაკეთებთ, რომ განმტკიცდეს ურთიერთობა ჩვენს შორის. მე ნამყოფი ვარ ინდოეთში, როცა ცოცხალი იყო ინდირა განდი და შევხვდი მას,“ – ბრძანა მისმა უწმინდესობამ.

„თქვენო უწმინდესობავ, მადლობას გიხდით მიღებისთვის. მინდა დაგიდასტუროთ,

რომ ხანგრძლივი ძმური ურთიერთობა აქვს საქართველოს და ინდოეთს. ინდოეთი სეკულარული ქვეყანაა, რომელიც პატივს სცემს ყველა რელიგიას. ჩვენ ვართ ძალიან ამაყები, რომ გვაქვს საქართველოს ერთერთი დიდი წმინდანის, – ქეთევან დედოფლის წმინდა ნაწილები, ეს არამხოლოდ ინდოეთის მემკვიდრეობაა არამედ საქართველოსიც. როდესაც გასულ წელს წმ. ქეთევან დედოფლის წმინდა ნაწილები იყო ჩამობრძანებული, საქართველომ დიდი სიბოთი და სიყვარულით მიიღო. ეს ჩვენი საერთო მემკვიდრეობაა და ერთად უნდა დავიცვათ. ვიცით თქვენი თხოვნის შესახებ და თქვენს თხოვნას აუცილებლად გადავცემ მთავრობას. იმედი მაქვს, რომ ღმერთი ინებებს და ეს შესაძლებელი გახდება. ძალიან მოხარული ვარ, ასე კარგად რომ გახსოვთ ინოეთში ყოფნა და შეხვედრა ინდირა განდთან. მოხარული ვიქნები, თუ კიდევ ჩამობრძანდებით.

კიდევ ერთხელ უდიდეს მადლობას გიხდით, რომ მიმიღეთ და დამლოცეთ. ასევე მინდა გთხოვოთ, დალოცოთ ჩემი აქ მოღვაწეობის პერიოდი, რომ წარმატებით განვახორციელო ჩემი მისია.“ – განაცხადა ელჩმა.

მისმა უწმინდესობამ დალოცა ელჩი და წარმატებული მოღვაწეობა უსურვა.